

Tēnei te karanga! Tēnei te tangi! Kia tūwhera ngā tatau! I te  
whei-ao ki te ao-marama Tihei mauri ora!

Ko te mihi tuatahi ki tō tātou Matua nui i te rangi, ko ia te  
tīmatanga me te whakamutunga o ngā mea katoa, kororia ki  
tōna ingoa tapu i ngā wā katoa.

He mihi tēnei ki te whare e tū mai nei, te whare pupuri  
kōrero, tēnā koe.

Tokona ana a Ranginui ki runga, takoto ana a Papatūānuku ki  
raro, tū ana te ao marama, he mihi tēnei ki a rāua tahi.

E tangi tonu ana te ngakau ki tō tātou tūpuna e noho mai ana  
ki tua o te arai, arā te hunga mate kua wehe atu ki te pō.

Haere, haere, haere atu rā

He mihi tēnei ki a Ngai tātou arā te hunga ora, tēnā tātou  
katoa.

Ko Pukehuia me Ngāpukehaua te maunga, nāna ahau i  
whakaruruhau

I tipu ake ahau ki ngā tahataha o Tōukahawai me  
Mangawhero

I whakaterere aku tūpuna i tōku waka o Ngatokimatawhaorua  
mai i ngā whenua tapu o Hawaiki nui, Hawaiki roa, Hawaiki  
pamamao.

I noho tōku hapū a Ngati Hau me Ngati Kaharau ki raro i te  
tuanui o taku whare nui o Taitamatane.

Ko Rahiri te tūpuna, nāna tōku iwi i arahi arā te iwi kaha o  
Ngāpuhi.

Ko te wāhi haumaruru mō tōku whanau ko te marae o Te piiti

Ko Allaneyce Korewha te kaikorero e tu ake nei.

E 12 ōku tau

Ko Te Kura ā Iwi o Ōmanaia tōku kura.

Ka tino whakakāhoretia e au ki te rerenga tonu o te paru ki roto i ngā wai tapu o Hokianga. He tino taonga te wahapu nei ki a mātou ngā hapū o Hokianga. Anei aku whakaaro e pā ana ki tēnei tono kua tonoa mai e te kaunihera ā rohe o Te Tai Tokerau.

Tuatahi i te tau 950 i tae mai tōku tūpuna – Ko Kupe tōna ingoa. I tae tuatahi mai a Kupe ki Hokianga, i kite ia i te kaha o te rama, ā ko Te Ramaroa tēnā, i ataarangitia te rama ki runga i ngā wai o Hokianga, i whakaingoa a Kupe i te wahapu nei “Ko te puna o te Ao Mārama”. I tana wehenga atu ki Hawaiiki i waihōtia e Kupe i āna mōkai hei kaitiaki ki te wahapū, ko Arai te uru ki te tonga, Ko Niniwa ki te raki, kei reira tonu rāua e tiaki ana. E pēnei ana mātou ki ngā mōkai a Kupe, he kaitiaki, ko tō mātou mahi kia tiaki i te wai me ngā tamariki a Tangaroa e noho ana ki roto i ngā wai tapu nei.

I te tau 1350 i tae mai ngā waka e whitu mai i te whenua o Hawaiiki, i tae mai a Nukutawhiti i runga i te waka o Ngātokimatawhaorua. I whakarite a Nukutawhiti he whare wānanga ki te taha o te wahapu nei hei whakaako i ngā āhuatanga tawhito. Ko Nukutawhiti tētahi anō o ōku tūpuna. He tino taonga tēnei wāhi ki a ia noki.

I te tau 1840 i hainatia ōku tūpuna i te Tiriti o Waitangi. I roto i taua tiriti ā ko te kōrero nei: “Ko te Kuini o Ingarangi ka whakarite, ka whakaae ki ngā Rangatira, ki ngā hapū, ki ngā tangata katoa o Nu Tirani, te tino Rangatiratanga o o rātou whenua o rātou kāinga me o rātou taonga katoa”. Ko mātou ngā tangata, ko mātou ngā Rangatira ā ko mātou tēnei e tū

ana me tō mātou Tino Rangatiratanga hei tiaki i tētahi tino taonga ki a mātou, ā ko te wahapū o Hokianga.

E tae mai ana ngā manuhiri nō ngā hau e whā hei whakarongo ki ngā kōrero o ōku tūpuna, hei tū ki te taha o te wahapū o Hokianga, ā, te wāhi tuatahi o Kupe. Anei taku raru nui....ko ngā kōrero matua o ngā hapu o Hokianga ā “Ko Hokianga te tino taonga ki a mātou” engari ka uru tonu tā mātou paru ki roto, he taupatupatu nui tēnā ki ahau! E mōhio ana ahau he huarahi pai ake, whakamahia te whenua hei mitia e te paru, ehara rawa ko te Moana!

Ka kohikohi tōku whanau i ngā kaimoana mai i ngā wai o Hokianga, ka hī ika tōku Pāpā, me ōku Matua kēkē ia te wīkene, ia te wīkene hei rapu kai mō te whanau. Ko te ika me te kaimoana he tino kai mō tōku whanau, mena kāore mātou e taea te hoko mīti mai i te toa hokomaha, e taea tonu ana mātou te haere ki te hī ika, ki te kohikohi kaimoana noki.

I ngā wā o mua, e pēnei tonu te mahi o ōku tūpuna – te kahi kai mō te whanau, he pātaka kai, he wai hei whakaora anō i a mātou, he tino taonga.

Mena ka whakaae te kaunihera kia haere tonu te mahi uru paru ki te wahapu nei ka raru ki ngā uri whakatipu, āku tamariki, āku mokopuna, kāore au e hiahia ana te waihō tēnei raru mā rātou kia whawhai ai. Whakamutu atu koutou mā!

Hei whakaoti i taku kōrero...e hiahia ana ahau te whakapuaki i te whakatauki nui a Pāpā Harding Leaf...Kia mate ā ururoa,

kaua e mate ā Tarakihi...kāore au e takoto ana pērā ki te  
Tarakihi kia mātakitaki i te pouri haere o te wahapu nei, ka  
whawhai tonu mātou pērā ki te Ururoa.

Tuturu whakamaua kia tina, TINA

Haumi e Hui e TAIKI E

Tēnā koutou e te kaunihera o NRC, o FNDC noki.

Nei ko ahau ko Dixon Titore e mihi atu ana ki a koutou katoa  
Tuatahi ka tuku mihi atu ki te runga rawa nāna nei ngā mea katoa o te whenua o te rangi o  
te moana anō hoki.

Ka huri ki o tātou tini aitua kua whetūrangitia. Ngā mate o ngā tau, o ngā mārama, o ngā wiki  
- huri noa atu. Koutou rā e haere. Haere koutou ki tua i te pae o maumahara. Haere atu ra!  
Tēnā hoki tātou ngā urupā o rātou mā kua huihui mai nei i tēnei rā ki tēnei hui  
whakahirahira.

Tēnei ka tū ki te kōrero atu ki a tātou i āku maharahara nui kei roto i te ngākau.  
Roa ngā tau e noho atu ana i te pouri nui o ōku hapū ki te tahatai moana i te wahapu o  
Hokianga.

Koia tēnei ko te wahapu i hau mai tōku tūpuna nui a Kupe i runga i a Matahourua. Ka rua i  
tau mai tōku tūpuna nui a Nukutawhiti i runga i a Ngatokimatawhaorua i kōnei - nāna hoki i  
huaina e ia tēnei waahi ko Hokianga Whakapau Karakia.

Tae atu ki ēnei rangi, ka mau tonu nei tātou i ngā kōrero me ngā tikanga taonga tuku iho o  
rātou ma.

Ka mutu, ko tōku pouri nui mō te wai - e aroha ana ki o tātou taonga, te moana. Nā te mea e  
rere tonu ana ngā tiko, ngā tutae, ngā parakino ki roto i tō tātou wahapu. Kua hē mai koutou  
ki te whakamana mai i a tātou te hau kainga mō te oranga o te wai i kōnei. Kua hē mai  
koutou ki te whakapono ki te Tiriti o Waitangi, arā ki tō tātou Tino Rangatiratanga o te  
whenua me te moana hoki. Mea ana te Kuini kei a tātou te mana o wēnei taonga, ēhara nō  
te Kaunihera tonu.

Kei hea tō koutou aroha mō te taiao nei? Kei hea tō koutou kaitiakianga mō te taiao nei?

Mea rawa ake ka rāhuitia ai te moana i a tātou i te mea kua paruparu katoa o tātou wai.

Nō reira e te Kaunihera - koutou ngā kaiwhakahaere - taringa areare mai ki a mātou ngā  
tamariki o nāiane!

Mutu ake tēnei mahi tūkino ki te wai. Me rapu he huarahi kē mō te oranga o ā tātou taonga,  
pēnei ki tō tātou wahapu.

He taonga tuku iho

Nō reira tēnā koutou, tēnā koutou, tēnā tātou katoa

Ko Ngātokimatawhaorua te waka  
Ko Nukutawhiti te kaihautu  
Ko Pāpātara te tohunga  
Ko Hokianga whakapau karakia te moana  
Ko Pukehuia me Ngāpukehaua ngā Maunga  
Ko Tōukahawai me Mangawhero ngā Awa  
Ko Ōmanaia te whenua  
Ko Te Piiti te marae  
Ko Ngati hau me Ngati Kaharau ngā hapū  
Ko Ngāpuhi nui tonu te Iwi.

Ka tū kaha ahau hei kaikōrero mō tōku kura, mō tōku whanau anō hoki. He aha tōku tino hiahia i te mutunga...kia whai wāhi anō mō te paru e rere tonu ana ki roto i tō mātou wahapū. E ai ki te Tiriti o Waitangi, kei a mātou te Rangatiratanga o o mātou taonga katoa. He taonga te Moana ki ahau

Mai rā anō kua haere tōku whanau ki te Moana ki te ruku, ki te kohikohi kaimoana, kāore au i te pīrangi mō te taunga mai o te māuiui i runga i tātou nā te kaingia o ngā kaimoana kua whakapā atu i te paru.

Ko te Moana he wāhi harikoa mōku, mō ōku hoa anō hoki. I te wā raumati, ka haere mātou ko ōku hoa ki te taha moana kaukau ai, ia te rā ia te rā, ā muri atu i te kura kei reira mātou e kaukau ana. Ka pai ahau ki te peke mai i ngā wāpu ki roto i

te wai, he mea hīkaka rawa mō ngā tamariki o te wāhi nei. I ngā tau e heke mai ana, ka taea tonu mātou te kaukau ki roto i te wai? Ka taea tonu te peke mai i ngā wāpu?

Kua tae te wā koutou o te kaunihera, whakapai te wahapū, tiakina te taonga nei, whakakore i te urunga o te paru ā tāngata ki roto i ngā wai o Hokianga. Mō ngā tamariki te take, mō ngā mokopuna te take, mō ngā uru whakatipu te take.

Whano, whano, haere mai te toki, haumi e, hui e, tāiki e  
Mauri ora ki a tātou.

I whanau mai ahau ki raro i ngā maunga o Pukehuia me Ngapukehau

Ko Tōukahawai te awa, nāna ahau i whāngai.

I tau ōku tūpuna ki te whenua o Hokianga i roto i te waka o Ngatokimatawhaorua.

Ka noho ōku hapū o Ngati Hau me Ngāti Kaharau ki raro i te tuanui o tōku whareniui a Taitamatane i runga i te marae o Te Piiti.

He uri ahau o te iwi kaha o Ngāpuhi nui tonu.

Ka tū ahau hei māngai o te whanau Hauraki, o te Kura o Ōmanaia anō hoki.

Ko Kayson Cooper-Matenga ahau, ka mauri tau.

Whatungarongaro te tangata, toitū te Moana...Twice a day human waste is being pumped into our harbour, you can see it and you can smell it. Our old people speak of the days when you could predict when the kahawai would be running, they would tell us of the abundance of kutai and kina on the shores of our harbour. Why is it these days that it is the luck of the draw if you go fishing and the kahawai are running, these days you have to hunt high and low to find kina and kutai. Im no Scientist but it doesnt take a Scientist to tell us what is happening to our kaimoana, what is happening to our harbour – they are being polluted by the sewage being discharged into waters of our harbour TWICE ---A----DAY!! I love kutai, i love pipi, i looooooveeee kina but the thought of eating kaimoana that has been in contact with human waste disgusts me.

Ka ora te whenua, ka ora te wai, ka ora hoki te tangata. I think every one of us in this room has swum in the harbour, i think everyone in this room has built sand castles on the shores of our harbour, i think every one of us has walked along the shores of our harbour getting our feet wet as we go. Its our playground, its where to go to have fun and enjoy being with our whanau and friends. In 35 years time if this pumping of sewage continues in our harbour we may not be able to do these things that we love, that are part of who we are. I know that one day i want for my tamariki and mokopuna to enjoy it the way that I do.

He Mauri tō ngā mea katoa, kia ora ai te Mauri! Everything has a Mauri, the essence of what makes it special. Our wahapū's Mauri is being dealt blow after blow, we must restore it and bring it back to the state it was when our tupuna walked this whenua. My whanau and I, my school mates and I, my community and I, we have a job to do, and that is to stand up for our beautiful harbour, restore it's mauri and the mauri of all the things in it. Our kuia and kaumatua have been saying it for years and I am going to say it again....NO MORE KAKA IN OUR HARBOUR. Kia ora anō te Mauri o ngā wai tapu o Hokianga.

Tihei Mauri Ora!



Tēnā koutou katoa, e aku whanaunga arā ko te Mana whenua o Hokianga whānui, e te Kaunihera o Tai Tokerau ki te Raki, kia koutou noki o te kaunihera ā rohe o te Tai tokerau

*Ko Roharoha te Maunga*

*Ko Ngātokimatawhaorua te Waka*

*Ko Waiarohia te Awa*

*Ko Hokianga te Moana*

*Ko Te Whakarongotai te Marae*

*Ko Ngati Whararā, me Ngati Korokoro ngā Hapu*

*Ko Ngāpuhi nui tonu te Iwi*

*Ko Kelly Trebilco tōku ingoa*

*He Uri ahau nō Rāhiri*

*He māmā ahau ki āku tamariki, nō Ngati Hau, me Ngati Kaharau rātou,*

*He kaiako noki ahau ki Te kura ā Iwi o Ōmanaia*

I ahu mai au i te Maunga, mai anō. I ahu mai au i te Moana, mai anō. I ahu mai au i tēnei whenua, mai anō. I am born the legacy of mountain high, from long before. I am born the legacy of ocean wide, from long before. I am born of this great land of mine, from long before.

Tēnā tātou e te whare, kua huihui mai nei i raro i te maru o te kaupapa nui rawa arā ko tō mātou wahapū tapu o Hokianga whakapau Karakia.

Ka tū ake nei au hei māngai mō tōku whanau, mō ōku tūpuna, mō ōku uri whakatipu, mō ōku taura o te kura ā iwi o Ōmanaia. Ko te whakataunga mā mātou ngā hapū me ngā iwi o tēnei rohe, ā ko te whakakorengia o te mahi urunga paru ki te wahapū tapu nei, ehara mātou e whakaaetia ki te whakararu tonu i tō mātou taonga. He aha ai? He take taiao, he take hītori, he take whakapaparanga, me ngā take ahurea. Manaakitia mai, Whakarongo mai, ki tōku reo, ki ngā reo o ōku tūpuna anō hoki.

Ko te tuatauhi, Ka kōrerotia e au mō ngā take ahurea.

E takahi ana koutou i runga i te mana o ōku tupuna, ngā whakaaro me ngā tikanga o te iwi Māori. He kaitiaki wawana ōku tūpuna mō tēnei whenua, mō tēnei Moana, kāore anō te karauna, ā ko te kaunihera anō hoki kua tautokohia te mahi tiaki o ngā mahi ahurea o te iwi Māori o tēnei rohe, waihoki ko ō mātou mōtika kia tū hei kaitiaki o ō mātou “taonga katoa”. E ai ki te atikara tuarua o te Tiriti o Waitangi, kei ā mātou ngā iwi Māori i te tino rangatiratanga mō ō mātou taonga katoa. Ko te wahapu nei tētahi o ēnei taonga, nō reira ko mātou tēnei e whakahaere ana i tō mātou tino rangatiratanga hei tiaki i tō mātou taonga.

E mōhio ana koutou ngā kaiwhakahaere o te kaunihera ki ngā wāhi tapu, me ngā wāhi whakahirahira o te wahapū tapu nei? E mōhio ana koutou ki ngā āhuetanga hītori, me ngā āhuetanga noki o ēnei wā. Māku ētahi e whakamārama atu ki a koutou.

Tuatahi – Ko Ana Taniwha - e tata ana ki te whenua kua whakaingoatia ko Arai te uru. He wāhi tapu tēnei mō ōku tūpuna kia kohikohi ai i ngā koura i roto i ngā matata o te papa Moana.

Tuarua – Ko Morunga - te wāhi e tīmata ana ngā pari o Arai te Uru. He puke iti a Morunga e titiro ki raro ki ngā toka kōhi kūtae, ki te toka hī ika mō ngā Karati, he wāhi hoki hei kōhi pāua. He wāhi tawhito, he wāhi whakahirahira tēnei mā mātou ngā iwi o te rohe nei.

Tuatoru – Ko te wai tapu o Waiarohia - he wāhi tino tapu o ngā hapū o Hokianga, ā ko tēnei te wāhi i tau te waka a Ruanui. I reira, i whakarite a Ruanui me tāna iwi i te whare wānanga o Hokianga ki te tonga, ā koira te tīmatanga o Hokianga whakapau Karakia.

Tuawhā – Ko Waimahutahuta - te awa e rere ana ki raro i te maunga o Whiria, he wāhi e kī pai ana i ngā ika kanae, he kai matua o ō tātou tūpuna.

Tuarima – Ko Pouahi – arā ko te wāhi i tau ai te waka o Kupe, i ngā rau tau ki mua ko tēnei te wāhi i whakarite ai ngā tūpuna i ngā wāhi kūtai. He wāhi tapu, he wāhi kōhi kai noki.

Tuaono – Ko Tokataa - e tata ana ki a Niwa ki te waha o te wahapū nei ki te raki, e ai ki ō mātua tūpuna ko tēnei te wāhi i huna ai rātou i te waka o Ngātokimatawhaorua.

Tuawhitu – Ka huri ki ngā āhuetanga o ēnei wā, ko te wāhi kōhi pipi ki Koutu, ko te wāhi kōhi karahū ki Rawene, ko te hiranga noki ki ngā tamariki o te rohe nei, ā ko ngā Onepū ataahua, ko tō rātou wāhi tākaro ēnei.

Anei ētahi o ngā wāhi tino tapu ki a mātou, torutoru noa iho ēnei e whakaatu ana i te hiranga o te wahapū nei ki a tātou ngā iwi o Hokianga whānui. Me whakanui mātou, me tuku mihi atu noki ki te Moana o Hokianga me ngā āhuetanga e hōmaitia ana ki a tātou.

E ai ki tētahi kaumatua rongonui o te rohe nei “in order to retain our traditional sites, and the harbour; to preserve them and protect them from misuse and abuse we must understand our intergenerational obligations. I understand my obligation to preserve and protect our Harbour for my tamariki to enjoy, just as my parents made it their obligation to preserve and protect it for me. Ka tino whakaae au ki tēnei! Ka whawhai tonu mātou, mō te wahapū te take, mō ngā tamariki mokopuna te take!

Ka hoki atu ki te kaupapa o te wā, ā ko te hiahia o te kaunihera kia whakahou i te whakaaetanga o te waste water treatment plant ki Opononi me Omapere mō ngā tau toru tekau mā rima e heke mai ana. Me tirohia tātou ki huarahi kē nō reira ka ora tonu tō mātou wahapū, me ngā taonga kei roto.

E mārara ana ki a tātou e ngere ana te pūnaha wai para o ēnei wā. He aha te ngere? Ko te Failure me kī. Anei tō mātou kitenga ki tēnei ngere:

E ai ki ētahi kaihi ika o te rohe nei ā kua kite rātou i ngā momo para i roto i te wai, pērā ki te pepa hēru e mānu ana;

E ai ki ētahi i runga i te Pukamata o Hokianga – kua tau ngā momo kope ki ngā takutai o Hokianga whānui.

Ētahi o ngā wā kua tuku pānui mai te kaunihera ki a mātou ngā tangata whenua arā, kāore e taea mātou te kaukau, te kahi kaimoana nā te putanga mai o ngā ngārara kino o Ecoli.

Kāore tēnei i te tika!! Whakamutua! E utu pūtea ana mātou ngā rate payers mō tētahi pūnaha e ngere tonu ana.

E ngere ana i te hāpori, e ngere ana i ngā hiahia o ngā tūpuna, e ngere ana i ngā tamariki mokopuna.

Anei aku whakaaro mā koutou ngā tāngata o te Kauniera...ka pehea te tohatoha i te wai para ki runga i ngā pāmu, ki runga i ngā whenua, hei whakakaha i te tupu o te kai a ngā kararehe, pehea hoki te tohatoha atu i te wai para ki roto i te ngāhere, hei whāngai i ngā tipu?

Kua kōrerorerotia e koutou ki ngā kaiwhiwhi whenua? ngā kaitiaki whenua rānei e pā ana ki te huarahi hou? Kua pātai atu koutou ki a rātou mō te huarahi hei tohatoha atu i te wai para ki te whenua? He māmā noa iho te haere tonu i te mahi urunga paru ki te wahapū nei, engari kua e noho noa koutou mā, whakaarohia, kōrerotia, me mahia ngā huaraahi anō.

Nō reira, hei whakarāpopoto i tōku kōrero, me whai huarahi hou koutou. He taonga te wahapu o Hokianga ki a mātou. E ai ki te Tiriti o Waitangi, kei a mātou te Tino Rangatiratanga i runga i ō mātou taonga katoa, nō reira ko tēnei tō mātou whawhai nui mai rā anō, ahakoa kua tuhia kētia ki runga i te tiriti, i ngā wā katoa ka tirohia haere te karauna, te kaunihera, te kawanatanga rānei i te loop hole nō reira ka taea tonu to taraiwa i tō rātou bulldozer kei waenganui i ō mātou taonga. Me whai koutou i te pono, i te tika, i ngā kōrero o tā koutou Karauna.

Nō reira, hei whakakapi - Nā mātou te mana hei whakaae, nā mātou anō te mana hei whakakore, kia ū koutou ki ngā hiahia o ngā Mana whenua o te rohe nei, ā ka me kati te urunga o te wai para ki roto i te wahapu o Hokianga.

Mate atu he tētēkura, ka haere mai ano he tētēkura – he whakatauki tēnei e hono ana ki tō mātou whawhai nui hei whakaatu ki a koutou, e kore mātou e wehe ana, kei kōnei mātou, a te wā hoki, ka tū mai ā mātou tamariki mokopuna kia whawhai anō te whawhai.

Ka whawhai tonu mātou, ake, ake, ake

Kia ora o te whanau o te NRC me te FNDC

Ko Waiaria tōku ingoa.

He tauira ahau nō te kura ā iwi o Ōmanaia e mihi nei.

Ko au he tau waru i tēnei tau, ā, ko tētahi mea pai rawa ki ahau he kaukau i roto i te moana. I tēnei wā he nui tāku āwangawanga mō te parakino o ā tātou wai i roto i te wahapu o Hokianga.

E morikarika ana tō tātou wai e te tutai me ngā mea paruparu katoa e horapa ana i ngā wai o te kāinga.

Pouri rawa tōku ngākau i te mea kare koutou e hiahia ana ki te whakaora ai i ā tātou nei taonga me te mea nei i kore rawa koutou ki te kaha tiaki mai ki tō tātou wai.

Mena ka pēnā rawa ki te āhuetanga o te wai moana me pehea tātou ki te whakaora i a tātou te hau kainga?

Ko te moana ko au, ko au ko te moana.

Waihoki e pokea ana ngā kai moana pērā i te kutai te tio me ērā atu o ngā tino kai e te parakino.

Ko wai ka mōhio, akuanei ka pau katoa i a tātou wenei taonga kai.

Me whai whakaaro koutou ki te ataahuetanga o tō tātou wāhi, he whenua taurikura.

Pehea o whakaaro mena e kore taea tātou ki te hī ika, ki te ruku kai moana, take kua kino rawa ngā mea katoa i te wai.

Pouri rawa te ngākau.

Nō reira tēnei te take kua tuku au i tāku tonu kia koutou i tēnei rā.

Ki ahau kāre koutou e whai whakaaro ana kia mātou o ngā whakatupuranga o ēnei rā heke iho ki ngā whakatupuranga o te āpōpō. Me hoki koutou ki ngā atikara o te Tiriti o Waitangi e kōrero ana mō te tino rangatiratanga o ā tātou whenua, o a tātou moana.

E mea ana kei a tātou te mana motuhake me te tino rangatiratanga o te whenua me te moana ko te tino hiahia o mātou te iwi Māori kia aukati tēnei āhuetanga kino rawa atu.

Nō reira e te kaunihera me whai whakaaro ki a mātou kōrero, **ME AUKATI!!**

Ka nui tēnā mō tēnei wā nō reira tēnā koutou, tēnā koutou katoa.